

RÜCKBLICK.....

auf die Büttenrede
von Helena Pauly

 *Merçi*



Wie es früher war *Eine Büttenrede von Helena Pauly*

Frieher war es manchmol a ganz scheen.
Doch das wolle die Junge net vastehn.

Wamm ma frieher Hunger gehaat hat,
do gab's kenn Trara,
ma hatt sich de Bauch mit Grummeere voll geschlaa.

E fettes Stick von de Wutz,
unn Kraut aus de Bitt,
zwei Tellere voll Stambes,
do war ma werrer fit.
Kenn Schnitzel, kenn Steak gab's do in de Woch,
ich schwätze net dumm,
ma wisse es jo noch.
Mir hann uns gelatzt,
ob alt orrer jung
an Fludde, Herzdriggerdte, Dammbnudele
unn Waffele met Tunk.

War de Mann emol mied unn war nix me drinn,
stellt em sei Frau e Pann voll Grummeere hin,
zwei Eijer driwwer,
die wirkten Wunner
unn die miede Männer ware werrer munter.

Nur an Feschde da wurde geschmatzt,
do hatt ma sich dann so richdich gelatzt.
Viel Fläsch am Disch hat ma domols net gekennt,
dovor isch ma a seltener zum Doktor gerennt.

Die Kinner friehere ware net verhätschelt,
an denne wurde net stännich erum gedätschelt.
Die Vaddere hann sich net verkraddelt,
hann die Kinner net pariert, wurde sie verdachtelt.
Kaugummi hann die noch net gekennt,
die senn mit Quewetscheschmeer durch
die Gegend gerennt.
Of Owegelehde met Kässhmeer ware die ganz versesse,
das war a schon domols e Delikatesse.

Es Gesicht verschmeert,
von hinne un voore met Kässhmeer uns Sießschmeer
bes hinner die Ohre,
die kannte kën Tennis, Yoga, Gymnastik, das ganze Bla-bla,
die spielte Versteckelsche un hann Dänzer geschlaa.
Owen ware die gelärrert un ware lieb
von lauter Fangsches spiele unn Hähnche kipp.

Un Samsdaahs owens do hat's gefluppt,
do hat ma die ganz Karona mit Kernsäf geschruppt.
Die gudd Säfbrie hat fa all Kenner gereicht
Unn dann hat ma damet hinerher noch die
Wäsch engeweicht.
Denn so e gudd Säfbrie,
die schitt man net aus,
met der kommt die „Sauberkeit selwer in Haus.

Die frisch Unnerwäsch hat sich rau angefiehlt,
 die war jo noch net met Lennor gespült.
 Die junge Mäde wäre heit entsetzt,
 so hat das Zeich am Leib gekrätzt.
 Die Weibslait hatte kenn Reizwäsch,
 a kenn Babydoll,
 die Unnerhose ware zwei Rechts-zwei Links
 unn aus Woll.
 A ware die net durchsichdich un met
 Blemcher bestickt,
 Die ware scheen lang, bis zu de Knie gestrickt.
 Do konnt ma kän Erkkältung krien,
 do hat jo kän Sunn unn kän Mond hingeschien.
 Unn ihr Junge, von weche Jeans, eng und prall.
 Die Leib- und Seelbux hat alles scheen worm gehall.
 Der arme Busen wie war er geplätscht,
 denne hat es Unnerleibche ganz verquetscht.
 Es war alles unter Dach und Fach,
 unne lang und owwe flach.

Domols hat ma noch net vorm Fernseh gesesse
 unn pundweis Praline und Stixi gegesse.
 Weche dem Programm am Glotzkaschde gab's
 domols känn Krach,
 ma hat sich beizeite in die Klapp gemacht.
 Sie hann sesamme in eenem Bett geschloft,
 es war so die Art unn hann debei
 noch die Heizdeck gespart.

Viel Kieh im Stall unn die Rinner,
 unn am Disch e Haufe Kinner.
 Die Kinner dun mir heit noch läd,
 zwei bräde Better hann se gehaat,
 ens for die Buwe un ens for die Mäde.
 Die Decke so kurz, ens leit immer bloß.
 Unn nur ener Wecker, unn denne hat es Groß.

Die Großmamme, was hat die sich
 morjens gedummelt,
 uns all met em Steck aus em Bett gedrummelt.
 Was hann'se gemault unn a gequert,
 doch die Großmamme hat von unne gebärt:
 „Mache ner nonnerno“ ruft se iwwer de Bitt,
 “ Unn Liesche,
 bring grad noch die Nachthäbcher mit“
 Unn die Gret macht gleich Feier
 unn holt es Strohwisch aus de Scheier.
 Mem Kathreiner hann se net gebrutzt,
 unn de Vadder hat sei Priemsche en
 de Kohlekaschde gesputzt.
 Do gabs noch kän Müsli unn Kabatrunk,
 do hann'se die Brotkorschde in de Kaffee getunkt.
 De kleen Matz, der hat gegresch unnsei
 Daumegeluscht,
 unn esch doriwwer ball vom Stuhl gerutscht.

Die Mamme geht in de Stall unn melkt die Kuh,
 „Matz du gehsch met, hebscht de Schwanz,
 dann hann ich mei Ruh.
 Du duusch dann a net in de Nas erum bohre,
 sunscht schlaat mir die Kuh de Schwanz um die Ohre.“
 Sie fangt on zu melke, do hat's der im Kopp gefummelt
 unn in de Bläss ihrem Bauch, do hat's schon gegrummelt.
 Sie ahnt nex Gurren, „Geh eriwwer mei Freggert“,
 do war sie schon von owwe bis unne verkläggert.
 „Geh, hol die Gäsche, jetzt wird se genäht“,
 do hat se noch in de Emer getret.
 De Kleen hat gegresch, sie hat ne geflascht,
 do kommt a noch de Babbe en de Stall gedratscht.
 „Bleib du dort stehn“ hat se gesaat,
 „sonsch stehst du a noch im Spinat.
 Du bescht jo immer e Besserwisser,
 wesche deine Rummelblädder hat die Bläss
 jetzt de Schisser“
 Do hat er gesaat: „Das muss jo eraus,
 ich bin jo an allem Schuld, do in dem Haus“

So war dass frieher, das schwache Geschlecht,
 das hatte a domols schon immer Recht.
 Mir ware gesetzlich net emanzipiert,
 doch gar net so ohne, unn sehr kuraschiert.
 Mir hann net geraacht, von Krankhät kän Spur,
 mir brauchte kän Psychater, und kän Kur.
 Mir mussde unser Fett net in de Sauna abschwitze,
 kän Schloftablett unn a kän Spritze.

Iwwerhaupt hadde die Leit frieher, und das
 war kän Schade,
 ihr Hausmeddlecher, unn kän chemische Präparte.
 Die hadde a immer, das glawe mir,
 nur en Ohr am Busen der Natur.
 Drum ruf ich eich zu, es sei wie ein Schwur,
 ihr Leit, besinne eich, zurück zur Natur.

